

光緒江西通志

江西通志卷一百三十六

列傳三 南昌府三

明

朱善字備萬豐城人九歲通經史大義能屬文元末兵亂隱山中著詩經解頤史輯洪武八年對廷試第一授翰林院修撰奏對失旨謫遼東敎授未至放還鄉召爲翰林待詔上疏論婚姻律曰民間姑舅子若女及兩姨子若女法不得爲婚讎家訛訟或已聘見絕或旣婚復離或成婚有年兒女成行有司偏奪按舊律尊長卑幼相與爲婚者有禁姑舅兩姨子女無尊卑之嫌今江浙此事猶多以致訟獄繁興願下羣臣議弛其禁帝是之十八年擢文淵閣大學士論說多稱旨未幾請告歸卒

年七十二卒之前有星如虹墜其舍正德中謚文恪
錄白志舊案聶鉉一齋先生墓志云公諱善繼字備萬別號一齋列卿錄單名善無繼字又登科考洪武六年特諭中書省各處科舉俱暫停罷自是以後罷進士科者十有一年至甲子三月詔禮部重定科舉法則洪武八年未嘗舉行廷試也郭書列卿錄朱善傳及聶鉉所撰墓志皆以爲洪武八年廷試第一或辟舉召試歟然別無可考也

胡季安南昌人敦行博學元至正進士爲景州學正避世家居高皇帝定鼎徵授編修命講孟子稱旨擢國子祭酒朝廷制作多其手裁嘗奏定科舉程度詔允行之

書豫章

劉秩字伯序豐城人吳元年授典籤尋命檢閱經史出爲徐州同知召議登極禮升崇明知州民素苦酒稅繁重及塗田未成而賦有額秩至俱奏蠲之又請減戶口

食鹽米三萬石有奇民爲立生祠未幾以誣被謫幼子

遜年十二詣闈訟冤上親鞫實斬誣者秩竟棄官歸有

聽雪篷詩集

白志原案秩幼子列朝詩傳作孫孫安

與詩傳合但非秩孫也孝義傳則作靜治一人二名

與詩傳合但非秩孫也孝義傳則作靜治一人二名

邢靜後官真定縣丞其訟父冤事楊維楨爲序之

甘惟寅字孔肅豐城人與弟仲肅從進士陳植講學於

龍光書院與邑人朱善劉秩爲友交相砥礪知縣林弼

嘗稱之曰識之正志之定隨所遇安其命有樗櫟集

人物人

林志白志舊案

志

李叔正字克正初名宗頤靖安人年十二能詩長益淹

博時江西有十才子叔正其一也以薦授國子學正洪

武初告歸復以薦爲學正遷渭南丞同州蒲城人爭地
界累年不決行省以委叔正單騎至其處數語立決遷

興化知縣召爲禮部員外郎以年老乞歸不許改國子助教於是叔正三至太學矣諸生多貴胄不率教叔正嚴立規條旦夕端坐督課無倦色朝論賢之擢監察御史奉命巡嶺表瓊州府吏訐其守踞公座簽表文叔正鞠之守得白抵吏罪太祖嘉之曰人言老御史懦乃明斷如是邪累官禮部侍郎十四年進尚書日本國王良懷遣僧如瑤等貢方物及馬匹帝郤其貢命叔正移書責之未幾卒於官叔正妻夏氏當陳友諒陷南昌時投井死叔正終身不再娶明史列傳

朱夢炎字仲雅進賢人元至正進士爲金谿丞以博洽聞太祖召居賓館命與熊鼎集古事爲質直語教公卿子弟名曰公子書除國子博士奏對詳雅文章有根據

遷翰林編修坐累謫官起爲禮部員外郎進侍郎拜尙書帝方稽古右文夢炎援古證今剖析源流如指諸掌

朝論咸服未幾卒於官

列傳
卿

焦位字致中進賢人遊吳澄之門授書經以純孝聞元末兵亂痛父母死於非命誓不飲酒食肉結廬墓側洪

武初辟池州教授

林志

范敬先字思祖新建人洪武進士授監察御史嘗指陳時政言詞過懸命磔諸市磔者已披其兩乳敬先曰且止吾將有獻索筆爲詩謝上有聖主磨礪梁棟材之句詩進特釋之俾充交趾吏召還除趙府長史趙府敗以嘗切諫僅斥爲編氓或憐其貧助之粟舟遇親知告以嬖舉粟舟遺焉竟困乏而終

林志

包宏字用夫進賢人希魯次子洪武初舉文學陳情乞
養再以文學首舉辭不獲至京上問陰陽鬼神對稱旨
奉使山西察苛政至洪洞縣官舍疾革大書於壁曰學
傳乎道統心貫乎一德功被乎天下言利乎後世此聖
賢之學君子之事也書畢正衣冠端坐而逝有訥居文
集六書補義各若干卷

人物志

張謙字彥道南昌人明經飭行蔚有時名元末教授東
湖宗濂兩書院洪武初舉文學拜監察御史尋辭歸江
西布政使李公儀薦入朝講周易稱旨吏部覆試第一
授刑部右侍郎

林志

李仲訓南昌人洪武間襄陽教授通五經厯司文衡所
取多掇巍科者有詩文行世稱江南十才子之一

湖廣通志

丁之翰字季藩新建人儼子幼從父授經領悟絕人稍長精五經學有文名元末兵起時歲饑疫饑囊以贍姻族明初授本縣敎諭遷進賢學性剛介不隨流俗造士以明體爲先徵爲主事以疾辭還職著潛夫集及編本府圖志白

倪孟賢南昌人洪武中知麗水縣有賣卜者嘗于富室不應詣闕告大姓陳公望等五十七人聚眾謀亂命錦衣千戶往捕孟賢詢知無有又微服往調見其男女耕織如故歸謂寮屬曰朝廷屬孟賢宰是邑欲令拊元安田里豈可坐視嘉師枉受惡逆名卽具疏聞復委耆老四十人詣闕言狀上治告密者罪賜耆老酒食及道里費遺還白

冷自誠甯州人洪武庚午鄉試第一任應天府教授太祖重其經學每以先生呼之賜予甚數且命經筵進講

白志

徐益字荅益豐城人洪武閒從父戍瓊博通經史尤長詩賦爲鄉校師尚書薛公遠輩皆出其門與王霜筠楊行素朱四吟等相友善

廣東通志

劉孟雍名熙以字行南昌人洪武中舉人材知龍溪縣縣境山谷巖阻有陳永定久負固鈔掠孟雍至掩禽之先是吏緣姦弊徭役不均民多流亡乃覈戶虛實遞爲等差遂相率來歸勸耕省刑斷淫祀邑大治秩滿遷安

州知州龍溪民赴闕奏留加銜復任卒民爲肖像立祠

白志 原案劉孟雍林志以爲新建人舊記又以爲永樂朝人與此小異

蕭九萬南昌人洪武歲貢爲諸暨縣丞博學能詞翰賞
書容忍思慮四字疏其義揭門屏閒百姓以訟至者必
諄諄以是誨之後遷知華亭縣上疏民弊五事忤旨被
逮臨刑齧指血錄詩報母有微臣斬首丹心在尙有英
魂返故鄉之句浙江通志

徐鐸字孔聲豐城人國初薦與帳前參謀授郊社署令
厯升戶部尙書學術正大莅事公平坐免復起山東左
布政使豫章書

曾秉正南昌人洪武初薦授海州學正九年以天變詔
羣臣言事秉正上疏數千言大略謂創業與守成之政
不同開創之初則行富國強兵之術用趨事赴功之人
大統既立邦勢已固則普天之下水土所生人力所成

皆邦家倉庫之積乳哺之童垂白之叟皆邦家休養之人不患不富庶惟保成業於永久爲難耳於此之時當盡革向之所爲何者足應天心何者足慰民望感應之理其效甚速帝嘉之召爲思文監丞未幾改刑部主事擢陝西參政未行會初置通政使在位數言事忤旨罷免貧不能歸鬻其四歲女帝聞大怒置腐刑不知所終

志白

包寶夫進賢人力學明經事親至孝授徒邑之太常里暮歸忽遇虎銜其衣曳至林莽中釋而蹲寶夫謂曰吾被食命也但念父母衰老缺終身之養虎知我乎虎乃起復曳衣至故處舍而去人以爲孝感明史謝定住傳林志

黃麟字文昭弟鳳字文儀南昌人元末江右盜起奉母

避難備嘗艱險入明鳳綜治家務不以勞遺兄或私語
鳳盍爲蚤圖鳳曰吾兄弟自幼孤遭亂離今幸至此豈
忍不義而爲此舉與其分貲產而使子孫無爭孰若全
吾孝弟而使子弟自不爭乎兄弟年皆踰七十友愛不
替鄉人推稱麟曰仁翁鳳曰義翁云林志

王懷字景符師事包師魯得其奧旨隱居山林以道自
處弟子受業者皆循蹈正學卒年九十四林志

周銘字仲彝甯州人性孝友善屬文通詩書春秋三經
父瑾死節有司屢舉孝廉不就自號梅月二字皆顯林志
胡儼字若思南昌人少嗜學於天文地理律曆醫卜無
不究覽洪武鄉舉授華亭縣敎諭以師道自任改長垣
乞便地就養復改餘干學官許乞便地自儼始建文元

年薦授桐城知縣鑿桐陂水溉田爲民利虎傷人儼齋
沐告於神虎遁去桐人祀之朱邑祠成祖卽位以解縉
薦授翰林院檢討直文淵閣遷侍講進左庶子儼在閣
承顧問嘗不欲先人然少懶永樂二年拜國子監祭酒
遂不預機務時用法嚴峻國子生託事告歸者坐戍邊
儼至卽奏除之朝廷大著作多出其手修高皇帝實錄
永樂大典天下圖誌皆充總裁官居國學二十餘年以
身率敎動有師法洪熙改元以疾乞休賜敕獎勞進太
子賓客仍兼祭酒致仕復其子孫宣宗卽位以禮部侍
郎召辭歸家居二十年卒年八十三明史

萬鋼字仕堅南昌人洪武庚申應聰明正直薦高皇帝
問曰天下何人最樂諸選人對皆不稱鋼從容對曰畏

法度者樂上曰朕以爲守法度者最樂耳卽授廣平府同知有惠政嘗鑿石改道石中有文六曰萬銅改路南行人咸異之廣平民爲立祠

人物志

向寶字克忠進賢人洪武進士授兵部試員外郎擢通政使以不善奏對辭改應天府尹建文中謫廣西永樂閒復原官坐累繫獄左遷兩淮運判宣宗嗣位召爲都御史兼詹事給兩俸旋長南院以老疾致仕寶儒者有贊藉歷官廉介終始不移著疏巷稿

豫章書

吳存字宗性南昌人洪武鄉舉授刑部主事厯遷雲貴參議湖廣參政山東右布政使所至寬平明恕深得方面之體善吟詠工草書

林志

石彥誠字誠之甯縣人洪武進士授武義縣丞下車召

父老立廳事再拜請相助爲理或以爲過彥誠曰吾誠心必能動人府檄所部供億武義數獨多彥誠詣府力爭竟減三之一召修永樂大典父老送之皆垂涕書成遷知徐聞縣雖處急遽不妄捷一人公事亦未嘗不集上官按部或以私干一毫不應大學士楊溥以學術醇正宜居近侍薦未及徵用卒

林志登科考作彥成

黃宗載一名垕字厚夫豐城人洪武進士授行人奉使四方未嘗受餽遺永樂初以薦爲湖廣按察司僉事巨姦宿猾多諭戍銅鼓五開閉陰持官吏短長宗載榜數其罪曰不改必寘之法眾莫敢犯徵詣文淵閣修永樂大典書成受賜還任董造海運巨艦數十艘事辦而民不擾車駕北征徵兵湖廣使者貪暴失期宗載坐不舉

劾謫楊青驛夫尋起御史出按交趾及歸行李蕭然改
詹事府丞擢吏部侍郎英宗初被劾下獄未幾得釋遷
南京吏部尙書居九年乞休章四上乃許歸數年卒年

七十九

明史

丁維南字良正豐城人太祖倚任辟舉憲使房安雅知
其奇具以上聞授監牧署丞有政績兵部尙書劉備薦
太僕寺丞時太宗置北太僕之官方難其人維南以秩
滿至遂留爲北寺丞疏陳得失始創印馬之法馬用蕃
息勒碑以垂不朽四疏乞休乃允子侃字秉和洪武中
隨父宦京邸會太祖命民間俊秀子弟有能誦大明律
及大誥者卽令入對時侃九歲父負之而至御前莊誦
無遺特賜銀幣寶鈔弱冠領永樂乙酉鄉薦上南宮授

閩之清流訓導升吳江教諭建甯教授三典文衡乞休終明一代教職以名著者十一人侃與焉侃孫鍊字質純成化甲午鄉薦主教白鹿書院尋舉戊戌進士知湻安縣考最擢禮部祠祭司主事時纂修憲宗實錄擇廉幹官督集始末以屬鍊尋丁內艱歸廬於墓服闋補營繕司員外郎以年老乞休

人物志

龔鍊字子諫南昌人洪武鄉薦授給事中升雲南僉事四川按察使釋死罪未決者五十餘人年七十致仕歷任四十餘年家食時田園無尺寸增益妻嘗潛買金環至家將珥鍊給取視卽投諸江曰無汚我平素也

林志白

志舊案豫章書鍊子二人海清俱舉於鄉海官韶州知府廉直有父風清白有傳

盧淵字文濶新建人洪武中由監生授兵部主事歷升

郎中擢本部侍郎建文時坐事免永樂初復任淵居官勤慎視事及暮秉燭治文書不少懈同列自茹瑞而下咸心服而倚仗焉進表至行在疽發上遣中使賜藥日

同疾輕重狀以聞還掌兵部事卒贈兵部尚書謚恭順

豫章
書

黃子威名輅以字行進賢人洪武中由吏員薦署屯田司主事改長洲縣丞滿考升刑科給事中遷刑部員外郎永樂初吳淞大澇蹇義夏元吉交薦擢松江知府首蠲秋稅出廩賑給民賴以蘇宣德中以喪去官松民乞留巡撫胡槻以聞上謂蹇義曰朕聞松江煩劇難治渠遂能得人心如此其從之後以註誤謫戍邊其民復請得宥還職久之乃老郡中至今祠祀焉

人物志

羅觀字彥彬南昌人洪武閒以人才舉授丹徒知縣治稱最永樂初擢知鎮江府聲勳益著居任久威惠孚洽遠邇畏懷纂輯郡志行於世

人物志

劉端字季莊南昌人建文進士任兵科給事中春坊庶子遷大理寺丞奉敕撫安兩廣比還會內難已靖成祖遣端復職命治方孝孺獄端抱建文敕上殿慟哭言舊君何在臣不忍殺忠良願與諸罪臣同日死忤旨坐劓刑卒臨刑有詩其結句云綱常千古事此日屬銘彝聞者悲而壯之隆慶初詔祀省城之大節祠

人物志

王高字思登南昌人建文進士刑科給事中升大理寺丞靖難後與同邑劉端俱坐縊方孝孺憇樹剝鼻而終

隆慶中詔祀大節祠

人物志

張顯奉新人父士原洪武初以儒士薦不起嗜經史善草書學者稱爲誠齋先生顯以明經舉靖江王府教授

永樂中與修國史遷國子學正考績升監丞

豫章書

陳仲賢武甯人母病割股以進母尋愈永樂初事聞授

鴻臚寺丞旌表其門

豫章書

孫曰恭字恭齋豐城人永樂甲辰廷試第三授翰林編修厯侍讀志操堅貞問學醇篤爲文古而有法內閣三楊甚器重之

人物志

呂爰正奉新人永樂鄉舉授兵部主事廉慎守法厯升郎中益練習戎務升左通政仍理司事有武弁坐法爰正察其枉出之一日於坐隅見有黑光帽金質而縣外意必其人所酬亟追還之其操類此

林志

徐孔奇豐城人永樂進士授刑部主事改行在刑部以清慎公平著稱升嚴州知府疏食布衣無異寒素愛民如子夙夜唯以興除爲亟屬官中有不能者教之不善者諭之使改未嘗輒加以罪吏民傾戴入覲卒於邸

志

白志舊案孔奇字失考又明一統志載有徐伯恭

者南昌人山西行太僕寺少卿亦以清操著聞其字亦不可

考

萬觀字經訓南昌人弱冠成進士帝少之命歸肆學尋召爲御史改嚴州知府府東境七里灘有漁舟數百艇時剽行旅觀編十舟爲一甲令畫地巡警不匝月盜屏迹乃勵學校勸農桑奏減織造以銀代絲稅民皆便之九年考績治行爲海內第一既以憂去將除服嚴州民豫上章願復得觀爲守金衢民亦上章乞之朝廷異焉

補平陽府政績益茂有芝生堯祠棟上士民皆言使君德化所致考滿擢山東布政使卒於官

明史

范衷字恭肅豐城人永樂進士除壽昌知縣開荒田二千六百畝興水利三百四十有六區三考報最當遷邑人頌德乞留御史以聞許之尋以外艱去服闋起知汝州吏部尙書王直察舉天下廉吏數人衷爲第一性至孝廬父墓瓜生連枝有白兔三馴擾墓側鄉人莫不高其行

明史

李元凱名杰以字行豐城人永樂進士授婺源知縣時千戶所官怙勢不法奏汰除之有采木中使橫於徽郡元凱引義不屈棄官歸家無一畝之田從吳聘君與粥遊樂道終身忘其困約

人物志

史安字志靜豐城人永樂進士授禮部主事遷儀制郎中宣德二年交趾復叛兵部尙書李慶參贊軍事引安暨陳鏞以自助師行入交趾賊於官軍所經之地悉列柵以守總兵安遠侯柳升連破之有矜色安等言於慶曰總戎之意騎矣安知賊不示弱以誘我乎慶以告升猶不設備明日獨以數百騎先發賊伏兵四起升被槍死慶病歿副將崔聚整兵繼進賊驅象蹂之眾遂潰聚亦被執安及鏞皆死焉時守師隔遠未及其節聞

林志

日志舊案史安事詳見楊東里所撰墓表中陳鏞錢塘人官祠祭司主事

周瑾字伯榮甯縣人永樂閒辟授交趾金場大使時交趾新造受命行以老母幼子託其妻止擣一蒼頭往既莅任推誠撫馭交人懷之逾數歲交人叛攻金場甚急

瑾禦之不敵而死妻劉氏以節終

人物志

曹壽字曼齡豐城人文章雅澹尤工書永樂八年以經明行修薦授江都訓導會選宮僚擢春坊右司諫屢進詩賦御書褒獎歷翰林修撰

人 物志

丁鉉字用濟豐城人永樂進士歷任刑部郎中以精律例稱尙書何文淵薦爲本部右侍郎正統末寇犯京畿太監王振主親征不與外廷議及命下鉉上章言邊鄙之事惟嚴備不必親御六師不聽及扈從行師次唐家嶺軍中夜驚失大將所在鉉歎曰是可以言用兵邪因詣帳殿力請車駕還京上不能決連章請還皆爲振所沮寇奄至鉉遂遇害景泰初贈尙書謚襄愍錄其子琥

官大理評事

林志

鍾甫字迪勇南昌人幼聰敏稍長卽肆力聖賢之學偕族人詣京夏太常景慕其道延致於家同郡侍講孫曰恭數與還往因言甫於楊文貞欲令往見甫不屈遂就景所謁之竟亦不報謝逾月歸辟寶坻順德訓導皆不赴知府胡本惠薦令訓導本府學敦請乃就職未幾引退甫嚴毅方正抗志古人平居正襟危坐終日不見有惰容取予一介不苟或謂其矯俗不恤也時同邑萬齊領鄉薦爲崇陽敎諭篤學厲行與甫齊名

豫章書

熊直字敬方豐城人父達夫仕元爲福建路錄事卒官貧不能歸直始一歲隨母楊氏適吉田令吉水胡時中遂冒其姓爲吉水縣學生事胡父母皆年八十餘終以累舉不第不克復姓永樂甲午中應天鄉試尋卒于槃

先成進士直鄉舉時槩已官御史矣後贈右都御史直
銳意六經尤致力關洛之學所著有春秋提綱西澗集
大器集金陵稿世稱胡敬方先生學上胡廣誌墓猶稱
胡公及槩復姓後少傅楊士奇撰神道碑始稱西澗熊
公云謝志

熊槩字元節直子永樂進士鄉會試榜皆胡姓官大理
卿時始奏復姓槩少英敏聞父講左氏春秋卽知大旨
旣仕爲御史太宗幸北京仁宗監國見槩侍朝儀貌特
偉問侍臣誰曰胡槩且言其父直學行之美嘉嘆久之
以是父子大有聲於時擢廣西按察使調廣東宣德初
改大理卿巡撫南畿浙江設巡撫自槩始鋤除姦豪扶
植單弱威名赫然海鹽民吏慶奠聚無賴恣橫剽掠有

司累歲莫能禁槩捕誅之姦宄帖息修葺學宮及先賢祠墓優禮賢士升右都御史其始出也鬚髮如漆比還

皓然盡白人皆嘆其賢勞卒官年五十著有芝山集公

餘稿若干卷

明史

錢習禮撰墓誌

謝志舊案前志

胡氏今考

豐城

熊氏家譜及槩自請復姓表槩成進士

後父直方舉於鄉實非幼孤槩母郭氏乃吉水城西學

錄郭子沖女爲直元配並無改適事其幼孤隨母改適

冒姓胡者乃槩之父直也直父子雖籍吉水後子孫復

歸豐城前志直入吉安槩入南昌今俱改正又案南

昌府志云槩父熊直豐城進士遜惠吉士卒時槩幼隨

母適吉水胡氏是又以槩

爲庶吉士熊直之子尤謬

彭份字洗存南昌舉人知永平府前官遺逋累份鐫級者六矣終不以督各屬歲侵蝗不入境永大有秋人爭相效輸份得盡復所鐫級庚辰大饑流民萬計趨永就食份設鬻賑救全活甚眾車騎營兵乘夜鼓譟份戒守

柵扼巷始開門擊之時服其有定識

直隸通志

徐義字伯制南昌人永樂進士授御史厯廣東副使河南布政使所至有聲祖德明洪武中以耆老人覲太祖親訪民隱給鈔五萬錠命儲粟備賑德明歸立東賑倉於乾封鄉儲穀一萬石斂散以時無毫髮侵蝕鄉民賴之

林志

胡清南昌人以明經授沂州訓導永樂中知泌陽縣持身廉謹門無私謁前宰視學校爲不急務清日再視學爲諸生講說在任六年卒耆民歲時致奠焉

林志

陳紀南昌人永樂中爲湖州推官性廉介厚重有威吏民不敢欺讞獄明允號爲神君

浙江通志

王連字仲瓊新建人永樂進士授監察御史宣德中巡

按福建疏發中使取花鳥者恣爲貪虐狀詔卽其處誅焉部中爲之震慄

林志

崔彥俊字用章新建人永樂進士授恩州知府府治創立彥俊至整齊法度綏撫叛亡境賴以安九載滿老幼流涕塞途長官司爭進馬保留賜秩正三品復任丁內艱復除徽州府徽俗喜訟察其健而黠者寘之法衛卒故放縱攻剽不絕一切按治後莫之敢犯農時輒行境內勸耕桑間水利垂九歲致仕歸子琬有孝行

林志

雷誠原名鑑字誠智後更今名豐城人永樂進士授行人奉使稱職九載秩滿擢延平知府居官仁明廉介嘗

人物志

巡行屬縣詢問疾苦豪猾爲之斂迹民甚德之

志

舒敬字守中靖安人永樂進士授刑部主事改兵部車

駕司歷升嘉興知府胸次洞達周悉吏民情僞發摘無遺尤加意教化繕郡縣學課諸生以道藝時與肄習四禮坐忤鎮守太監免

人物志

熊觀字用學豐城人貢入國學永樂閒因精通律算敎習六館授刑科給事中改工部郎中遷常州知府廉潔公勤嚴於御吏江陰有田沒於江賦額猶在奏蠲之改知鳳陽歲饑勸粟賑濟正統閒升山西參政所至旌廉能懲食墨風采凜然及致政歸執經問業者無虛日號退庵

人物志

聶好謙名遜以字行豐城人永樂進士正統閒由刑部郎中知廣州府凡政有益於民者不顧利害爲之決獄必以平恕郡中稱爲仁懷太守巨寇黃蕭養聚眾攻城

城中人眾乏食好謙恐其生變卽白藩臬發倉賑濟或持不可好謙曰擅發倉廩其罪猶小若民饑生變禍不可測矣全活者甚眾寇亦聞風散去以疾卒閤城皆哭賊平眾卽仰高祠祀之林志

況鍾字伯律靖安人初以吏事尙書呂震薦授儀制司主事遷郎中宣德五年雄劇地九府缺守命部院臣舉其屬之廉能者用尙書蹇義胡漢等薦擢鍾知蘇州賜敕以遣之蘇州賦役繁重豪猾舞文爲姦利最號難治鍾乘傳至府初視事羣吏環立請判牒鍾佯不省左右顧問惟吏所欲行止吏大喜謂太守闇易欺越三日召詰之曰前某事宜行若止我某事宜止若強我行若輩舞文久罪當死立捶殺數人一府大震鍾乃蠲煩苛立

條教事不便民者立上書言之屬縣逋賦四年凡七百六十餘萬石鍾請量折以鈔爲部議所格然自是頗蠲減丁憂去民詣闕乞留者二千餘人詔起復上書言近奉詔書募人佃官民荒田官田準民田起科無人種者除賦額崑山諸縣民以死徙從軍除籍者凡三萬三千四百餘戶所遺官田召種應準民田起稅者二千九百八十餘頃應減稅十四萬九千餘石其他官田沒海者賦額猶存宜皆如詔書從事臣所領七縣舊著籍三十六萬餘戶秋糧二百七十七萬九千石有奇其中民糧止十五萬三千餘石而官糧乃至二百六十二萬五千餘石輕重不均如此乞敕所司處置悉報許時屢詔減蘇松重賦鍾與巡撫周忱悉心計畫奏免七十餘萬石

民大悅鍾爲政務鋤豪強植良弱興利除害不遺餘力
綜理周密簡約易行凡忱所行善政鍾皆協力成之所
積濟農倉粟歲數十萬石賑荒之外以代民間雜辦及
逋租由是流亡復業重學校禮文儒單門寒士多見振
贍秩滿當遷部民二萬餘人走訴巡按御史張文昌乞
再任詔進二秩如民請明年冬卒官吏民聚哭爲立祠

明史
白志

胡軫字敬同豐城人永樂進士厯兵部主事宣宗卽位
召對稱旨授中書舍人升夔州知府有無辜三人將服
上刑軫辨而釋之正統朝升浙江副使理學政子經亦
進士御史按察副使風采振於中外

林志

劉顯豐城人永樂鄉舉宣德閒除舒城知縣單騎赴任

興學校課農桑增開水利支分派別高下得宜爲人廉
直樂易去久而民益思之立祠祀焉同邑教授李景與
冢宰黃宗載言愛民如子無如劉顯撫字有方無如范
衷時稱確論人物志

彭遠字務本南昌人永樂鄉舉知祁州宣德中累遷淮
安知府癸丑歲饑流民四至乃相隙地構舍以居之發
廩粟日給二糜稍寬饑禁卽負擔者不坐所活以千萬
計民閒故乏耕犧遠爲假貸給予農務以興後被誣當
罷值中貴李德奉使過淮安郡人擁舟大呼曰煩公語
天子乞還我賢太守事聞宣宗命復留之治爲江北第
一正統六年超擢廣東布政使廣俗喪葬華侈下令趣
以葬期不半月暴露者皆有藏焉旋致仕明史趙豫傳

夏希純名甯以字行豐城人永樂進士授南京刑部主事厯郎中升陝西右參政振綱紀恤民隱調度邊餉覈斷民田皆井然有法希純始喪母廬墓黃金城以孝聞

人物志

楊時習豐城人永樂中由吏員拜大理寺評事奏對稱旨擢本寺卿出爲交趾按察使先是黎季犧來歸賜官羈京師忽求還祭埽時習知季犧爲交人所服恐有變連疏請留之不允後果叛同事者皆署降狀時習獨不屈懷印歸朝自白至則已籍其家矣及檢閱文書得前疏乃復官

人物志

丁倬字秉章豐城人宣德閒徵辟教職升常塗知縣宅身清約臨民平易

白志

熊鍊字學淵進賢人宣德進士授刑部主事調工部改大理寺正有誣僧妖言法當死鍊獨慨然曰一僧詎足恤但明知其冤而莫之白謂官守何力解之遷浙江提學僉事廉介正直以身爲教不事條約所至宿止學宮校藝精嚴高下不失鑑銖久之改廣東右參議適有采珠之役鍊區處得宜民不知擾歷廣西右布政使引疾

歸林

王得仁名仁以字行新建人本謝姓父避讎外家因冒王氏初爲衛吏以才薦授汀州府經歷廉能勤敏上下愛之秩滿當遷軍民數千人乞留詔增秩再任居三年推官缺英宗從軍民請就令遷擢政績益著沙縣賊陳政景糾清流賊藍得隆等攻城得仁與守將擊敗之禽

政景等八十四人餘盜驚潰諸將議窮搜得仁恐濫及百姓下令招撫辨釋難民三百人都指揮馬雄得通賊者姓名將按籍行戮得仁力請焚其籍賊復寇甯化率兵往援斬首甚眾俄遘疾眾欲輿歸就醫得仁不可曰吾一動賊必長驅乃起坐帳中諭將吏戮力平賊遂卒

正統十四年夏

白志誤冬也

軍民哀慟喪還哭奠者道路相屬多繪像祀之天順末吏民乞建祠春秋致祭

明史

丁俊字秉存豐城人宣德進士任御史巡按福建食惟豆腐人謂之豆腐御史陳智每舉以勵羣屬以剛直忤權貴謫嚴州推官

林志

謝一夔字大韶得仁子天順四年舉進士第一授修撰進左諭德成化七年彗星見應詔陳五事請正宮闈親

大臣開言路慎刑獄戒妄費語極劘擊被旨切責尋升學士進禮部右侍郎會李孜省用事薦引同鄉尹直李

裕劉敷等一時彙進一夔拜工部尙書時稱傳奉官未

幾卒贈太子少保正德中謚文莊著有文莊集力餘稿

東藩倡和詩

明史王得仁
白志

甘瑛字宗華豐城人宣德進士授禮部主事正統閒升漳州知府時軍衛強橫年例闢於有司暴取無厭瑛奏革以艱歸會邵武寇亂奪情起知邵武悉心撫戢冒瘴致疾乞歸成化改元詔進階瑛孝友端介始終一節鄉

評重之

府志

聶如斌豐城人宣德末任嘉善典史才能超卓且有冰操按察使軒輓輩交賢之事涉難辨者屬如斌無不盡

舉嘗職水利令民多築隄防爲水旱備潛載小舸察其勤情勸懲之北鄉洿下田不償種如斌督民高其圩壠遂爲膏壤歲值大水監司使者行縣檢災以如斌從使者有諱災語如斌乃自投田閒水深沒頂使者愧之

人物志

孫昌字曰蕃豐城人宣德四年舉鄉試第一授光山縣敎諭檄修實錄與廣西文衡大司寇楊甯以才堪大任薦升敎授時新建學校造士爲多至以孫夫子目之復典四川應天文衡有藻鑑聲升國子助敎卒

人物志

湯熙字光烈新建人正統間舉山西鄉試授海豐敎諭己巳之變上禦戎十二策所著有燕石稿

豫章書

羅曉字應詔南昌人先達胡儼稱其有倚馬才舉正統

進士授監察御史時閩盜五百餘人論死築奏覈之活三百餘人累遷右副都御史巡撫湖廣猺不用命乃出兵擣其巢穴平之歲饑糴粟六十萬石分道賑給全活甚眾召還掌南京都察院兼督操江上疏乞親萬幾用正人節賜予等事皆人所難言尋引疾歸著知庵集

林志

黃節字順中豐城人嘗從吳與弼學舉正統進士授兵部主事巡視古北白羊二口時冬月寇薄城令軍士以水灌城冰滑寇不得上乃去景泰末爲石尙書璞贊畫討湖湘寇以平蠻將軍李震師抵酉陽等峒襲殺賊數千級復乘勝破絞羅牛欄等峒七十八寨蓬峒尙未服節言於震宜乘兵威遣使招之可不戰而降震從其言賊爭赴營納款班師還升署郎中厯太僕寺少卿

林志

張寰字守中新建人正統鄉舉授工部都水主事冢宰
王翹才之改吏部考功司復除都水治徐州洪歲凶挽
夫多竄去在官剝筋類朽敗寰至卽簿錄民筋損其雇
直什一以贍葺之由是官筋獲濟挽夫亦還厯遷浙江
右參政致仕寰長身玉立言論洒酒動人性篤孝有盜
竄戶於其父墓者父一夕見夢比歸啟視信然乃別白
其尸重爲禮葬里人奇之人物志

涂謙字恆讓豐城人正統進士授監察御史己巳之變
侍講徐珵請遷都金陵謙上疏極言遷幸非計景泰初
巡按山西升山東按察副使青州饑以戶部所發三千
金糴米仍諭富室出粟以濟東昌諸郡又饑賑貸如青
州全活甚眾後以勞勦致疾卒林志

陳安字靜簡新建人正統進士授大理右寺副讞都察院獄有跋者坐爲盜安詰之曰汝等騎劫邪步劫邪僉曰步安曰跋者能走邪囚泣曰某皮工被誣至此遂白其枉清河縣校官以受贊爲生徒所訐刑部當罪安引卓茂亭長事奏聞得不坐遷陝西參議改雲南滇池暴漲禾盡沒軍民大窘乃勸勵土官斟酌帑藏以賑給活人十餘萬歷湖廣布政使致仕林志

萬祺字維壽南昌人爲郡功曹精星厯學正統閒赴京除鴻臚主簿景帝不豫時有議召襄王者石亨詣祺問休咎對曰皇帝在南宮奚俟他求亨悟率眾迓英廟復辟久之亨以祺名奏厯升部郎會曹欽反執尙書王翱學士李賢欲加害祺陳利害力救得免欽誅擢太常卿

累官工部尙書

林志

劉華甫名光以字行豐城人正統進士歷吏兵兩科彈劾不遜出知蘇州府特旨得便宜行事時瀕海田爲水所齧奏免虛糧三萬餘石以疾乞歸復起曲靖府夷酋例以牛羊金帛爲餽悉付有司爲修學資羅雄州逋征五載許以貨物代準不兩月告完再引疾辭歸十餘年

卒

林志

徐秉壽字山公南昌人正統歲貢授浙江慶元敎諭升嘉祥令邑大侵賑活不勝紀擢保甯同知以老致仕弟秉富字存義正統拔貢授河南祥符令剛方諒直有治

聲

豫章

劉季清字士廉南昌人景泰進士授南大理評事富民

王福訟子不孝季清曉諭百端感泣而去逾年經江滸
福引其子來謝又有姑訴婦不孝者訊之婦第悲泣不
言所以密問久之乃曰夫貸於鄰貧難償姑迫婦與私
通以求免婦不從耳乃逮貸主至一訊而服

孫章書

楊瑄字廷獻豐城人景泰進士授御史剛直尙氣節天
順初印馬畿內至河間民遮訴曹吉祥石亨奪其田瑄
以聞并列二人怙寵專權狀帝語閣臣李賢徐有貞曰
真御史也遂遣官按覈而命吏部識瑄名將擢用吉祥
聞之懼訴於帝請罪之不許未幾亨西征還適彗星見
十三道掌道御史張鵬等將劾亨吉祥諸違法事給事
中王鉉聞之洩於亨亨乃先與吉祥泣訴帝誣鵬等爲
已誅內官張永從子結黨排陷欲爲報讐明日疏入帝

大怒遂收鵬瑄及諸御史於獄榜掠備至且詰主使者
瑄等無所引乃坐都御史耿九疇羅綺主謀亦下獄論
瑄鵬死餘遣戍會大風震雷拔木發屋須臾大雨雹亨
吉祥家大木俱折雹尤甚二人亦懼於是帝感悟戍瑄
鵬鐵嶺餘貶知縣瑄鵬行半道適承天門災肆赦放還
或謂當詣亨吉祥謝二人卒不往復謫戍南丹憲宗卽
位並還故官瑄尋遷浙江副使按行海道禁將校私縱
戍卒立操法築海鹽捍海堤岸二千三百丈民得奠居
爲副使十餘年政績卓然進按察使西湖水舊可溉諸
縣田四十六萬頃時堙塞過半瑄請浚湖設防置牘以
利灌溉功未就卒海鹽人祠祀之

楊源字貴潔

明史作本清

瑄之子初爲太僕主簿宏治八年

明史

各省奏地震天鼓鳴源應詔陳言坐出位謫銅仁長官司吏目徙欽天監五官監候正德元年劉瑾典兵柄源奏自八月初大角及心宿中星動搖不止大角天王之座心宿中星天王正位也俱宜安靜而今乃動搖意者皇上輕舉嬉戲遊獵無度以致然耳伏望祇畏天威安居深宮絕遊嬉罷弓馬母輕出入遠斥寵幸節賞賜止工役親元老大臣日事講習章上不報十月復奏連日霧露交作爲眾邪之氣陰冒陽臣歎君小人擅權爲下叛上瑾怒矯旨廷杖三十明年又奏火星入太微垣帝座之前或東或西往來不定宣思患預防意在瑾也疏留中瑾召源面叱之曰爾何等官亦欲爲忠臣邪源厲聲曰官大小異忠一也復杖六十謫戍肅州以傷重卒

於河陽驛妻皮氏斬蘆荻覆尸葬之古城萬曆間河南

撫按奏請建祠於河陽賜額忠愍天啟初謚忠懷明史
楊道

傳劉文
集

李裕字資德豐城人景泰進士授御史巡按陝西上安邊八事石彪濫報首功詔裕覈實其從父亨以書抵裕焚其書以實聞亨亦旋敗由是有強直聲擢山東按察使重囚二百餘人或經十餘年未判裕旬月間決遣殆盡大峴山賊寨七十餘裕捕戮巨魁縱脅從亂遂平成化初遷陝西布政使入爲順天府尹政聲大著進右副都御史總督漕運兼巡撫江北諸府濬白塔孟瀆二河以便漕張秋南旺及淮安西湖舊編木捍衝激勞費無已裕易以石遂爲永利淮鳳方饑太僕徵預備馬二萬

匹裕論罷之在淮六歲每歲入計事陳利病多施行父
憂歸服除留佐院事代戴縉爲右都御史縉綱紀不立
裕欲振之御史有過或遭錙撻由是得謗汪直敗偕副
都御史屠滌請雪諸忤直得罪者帝不悅奪俸又坐累
調南京都察院考績赴都留爲工部尙書初吏部尙書
尹閔罷耿裕代之以持正不爲萬安所喜而李孜省方
貴幸用事欲引鄉人乃協謀去耿裕以裕代之裕本廉
介負時望以孜省故名頗損孝宗立言官交章劾裕進
由孜省裕不平爲辨誣錄連疏乞休去正德中卒年八

十八明史

熊尙初南昌人初爲吏以才擢都察院都事正統中用
都御史陳鑑薦遷泉州知府盜起上官檄尙初監軍不

旬日降賊數百已而賊逼城下守將不敢禦尙初憤提民兵數百與晉江主簿史孟常陰陽訓術楊仕宏分統之拒於古陵坡兵敗皆遇害郡人哀之爲配享忠臣廟

白志

丁傑字秉英豐城人德行淳潔博通經史隱居教授生徒景泰初御史涂謙以傑同吳與弼薦於朝下有司禮聘不起成化改元御史陳選復薦之稱其爲人倜儻不致詭激淡然無慕外心足爲一方高士及卒御史唐龍行部豐城設主於明倫堂祭之人物志

張幼文名載以字行甯縣人受學於南昌鍾甫華容人黎湧少從其父斌任甯縣丞與幼文交後以貢謁選湧爲吏部侍郎未嘗私謁羣諸生試授龍虎經厯湧甚重

之未幾引去操修端謹至老不渝

人物志

胡全字震卿豐城人崇仁吳與弼擇婿以女妻焉處甥
館厲志篤學幾二十年歸獨處一室衣食不給曠然不
介於懷教宗族子姓必先小學以及大學敦實行略浮
詞白沙陳獻章故同學晚與論道甚服其詣

人物志

李璣字世望豐城人景泰進士授御史巡按南畿升貴
州僉事調四川嘗劾湛總兵謀叛事得實籍其家時論
快之擢松潘兵備副使時徐謝二指揮有邊功爲當道
所抑璣奏升之其人佯爲獻果投金五百兩爲謝璣怒
而拒曰薦賢爲國豈望報邪其人慚而退以疾卒官蜀
人祠於名宦

林志

游明字大昇豐城人景泰進士授刑部主事時草場火

責在典守中官反誣附場衛卒縱火下法司擬罪明直其冤衛卒得不死通州軍儲倉歲以中官受賂虛出通關賣糧不下千石倉吏欲發其事中官賂以金吏持金訴於官戶部以中官故劾吏知情明謂大吏乾沒而小吏發之今轉坐告者罪是縱姦也竟白其枉天順末遷福建提學僉事修葺楊龜山羅豫章李延平諸先生祠及書院訪其子孫嚮學者補諸生八郡翕然宗仰滿九載都御史滕昭奏留加按察副使仍督學政卒諸生繪像祀於常袞祠

人物志

范鏞字彥聲豐城人衷之子景泰進士授刑部主事歷郎中升廣西按察副使時潯梧鬱林等處寇勢方張奉都御史韓雍檄親抵賊巢召其酋長諭以逆順皆望風

服有流賊猝至鏞督官兵捕殺之又以輕舟入大藤峽
降其眾巡至博羅陸川岑溪等縣築城衛民藉以無警
改分巡桂平道建永安州未幾潯鬱賊起都御史朱英
檄鏞往討賊聞鏞再至大驚叩頭請罪遷按察使又督
師破於靈山降鬱林賊千餘人人物志

王朝遠名漢以字行進資人景泰進士授監察御史天
順中與同臺共劾石亨降衡山知縣未行會天變還職
巡按廣東猺蠻入境守臣故匿不報朝遠以狀聞敕都
御史韓雍往討平之升陝西按察副使尋升按察使嵒
饑奏免稅糧及弛茶鹽諸禁民賴全活成化閒擢左僉
都御史鎮守甘肅以疾引歸林志

樊瑾字公瑾南昌人景泰鄉薦知吳縣改績溪尋調彭

山時松潘苗亂中丞夏墳以璉諳天文知兵略舉參戎事嘗出師見黑雲起自西方謂敵有伏兵宜防之帥不從果敗

林志

楊曄字好善南昌人由歲貢累任德州知州不以家累自隨歲旱祈禱不用師巫徒跣行赤日中焦勞致疾卒僚屬視故篋惟常服一褐衫猶未仕時所製也

林志

陳栗字景充南昌人景泰鄉舉知漳平縣縣新創庶務叢委栗敏於集事凡官府廨署學校壇壝以次就緒聞鎮海陳眞夙講正學延舍後堂師事之頑獘爲之嚮化在任五年以憂去漳民頌之不忘

人物志

毛瓊字漸明豐城人景泰鄉舉授鳳翔府同知寶雞縣有渠久湮瓊復疏之民稱爲毛公渠升長沙府時攸縣

多虎爲文告城隍神不二日捕獲其六七餘虎遁去秩
滿巡按奏留加四品俸視事未幾卒

人物志

劉子肅字敬之南昌人景泰進士爲人精悍嚴重初除
刑部主事錦衣指揮門達怙寵弄權入朝失貂裘欲置
主者罪子肅但杖出之門達出憾語不爲動出爲福建
僉事歸十年卒

林志

于大節字守正進賢人天順進士授行人擢監察御史
巡按湖廣以災異言事謫鶴慶推官厯浙江按察使風
節愈高摘伏刺姦威望大著以不阿權貴被誣遂稱疾
去都憲史琳等復交章論薦改山東按察使卒於官厯
任三十餘年清介絕俗攻苦茹淡終始一操

人物志

熊懷字性安豐城人天順進士授刑部主事遷廣平知

府歲饑發廩賑之全活甚眾改知衛輝府治最擢廣東參政時龍水猺獞猖獗師旅頻興懷轉餉不絕寇平賜銀幣厯左布政使宏治初冢宰數薦懷任巡撫以素不通問餽爲當軸者所尼久之遷南京光祿卿進南刑部侍郎以老乞休林志

涂柒豐城人天順進士成化中嘗言祖宗朝政事必與大臣面議自先帝幼冲未能裁決枋國者慮其缺遺假簡易之辭以便宣布凡視朝奏事諭旨輒曰所司知之此一時權宜非可循爲定制況批答多參以中官內閣或不與尤乖祖制乞復面議杜蔽壅之弊不能用終廣

東副使白志

涂觀字恆孚豐城人謙之弟天順進士成化間厯南京

吏部考功郎中察京朝官與章侍郎綸力爭可否既連署以上綸復別疏請汰十餘人命廷臣葉盛覈之竟從觀言遷衢州知府政尙寬平民懷其惠復知甯國尋致仕居家以孝友著性坦直雖面折人人不爲忤二子昇一作昇並舉進士一作升別有傳且都給事歷湖廣左布政使以才能著林志

張元禎字廷祥南昌人五歲能詩甯靖白志誤獻王召見命名元徵巡撫韓雍曰人瑞也乃改元禎天順進士授編修與時宰不合移疾去宏治初召修憲宗實錄晉左贊善遷南京侍講學士以母老謝歸久之召修會典加學士充日講官元禎長不踰中人帝特設低几就聽之旋以母憂去後召爲太常卿兼學士掌詹事仍侍經筵武

宗踐祚進吏部左侍郎尋乞致仕陞章弗許以疾卒所
述易書詩春秋要語四書集要太極圖說要綱目近思
錄家語解皆未脫稿天啟初追謚文裕始寘濠浮慕元
禎伺其家居數有餉饋度不可辭笥而藏之卽食品亦
計值以入歿後濠果使問其室其孫默捧笥以進稱亡
祖遺命愧無一言頌盛德負大王恩啟視纖悉不遺濠
爲之愧服有東白先生集二十四卷

明史豫章書

丁璣字元美豐城人天順進士授工部主事有權閻至
同官咸屈膝璣獨挺立權閻怒欲辱之璣向闕大呼眾
挽之詰旦皆詣謝璣竟不往諸閻時時於工部索匠璣
一切杜絕欲具奏聞自此相戒無敢復索匠者成化閒
升敘州知府百戶王甲占慶符縣民田數百畝且聚亡

命負固璐以計禽治籍田而歸之民有張乙者匿其兄
遺貲兄子詣府投牒璐祕之令固中盜指乙受某贓物
乙拊心誓曰是皆吾兄物有何名爲贓乃出牒示俾以
三之二歸其兄子諭之和好如初九載升廣東左參政
在敘城長甯廣城饒平皆親自綜理冒瘴以歿林志

楊崇字尙賢豐城人受吳興弼之學於胡九韶天順鄉
舉任桂林府同知行陽朔縣顧縣治瞰江垣堞庫甚使
人葦江石大者增其垣小者積垣下未幾蠻寇驟至莫
能涉有以筏薄岸者挈所積石擊之扶傷而去都御史
韓雍征大藤峽檄造戰船應期而辦升柳州知府復除
知永州府境內山田多旱崇親視渠堰連歲有秋築祁
陽城善規畫民不告勞先是永州徭役不均請於當道

行九等之法遂推其法於各郡又下令男女婚嫁從宜不得論賄貧甚者官給以布帛州縣婚嫁者九千有奇舊俗爲之一變以子廉貴贈南京禮部尙書

人物志

胡涇字源潔豐城人天順進士授監察御史按南畿捕宣城大猾汪深置之法有道會匿民婦居夾壁閒已逾年婦家誣其夫殺而沈諸江妄指他戶實之已伏罪涇廉得更其獄列郡以爲神復按雲南上疏減銀治歲課銀十有二萬湏人額之升雲南按察副使改陝西卒於

官人物志

黃琥字瑩之豐城人天順鄉舉授臨洮府同知督督賦平涼以所得羨餘代民輸逋額岷州用師督餉數萬區處不乏洮民歲苦河決作浮梁以濟涉民祠祀之先是

參將王果納賄違法所司莫敢問御史熊翀屬琥得其罪狀宏治初升肇慶知府隍舊有魚課繕錢以供鎮守中貴率辦於民琥至罷之積粟萬餘石以備荒又捍湖築隄瓦二百里擢廣東參政致仕

林志

熊景字開甫南昌人成化進士授刑部主事時部多大獄中官因緣爲市尙書輒以屬景按法一不爲動擢廣西按察僉事先是潯桂諸猺頻出爲擾景陰募人習猺中委曲者僞作鹽賈負鹽詣猺所猺不疑聚而問虛實答曰吾賈人不知新按察爲何人然見其方治巨器若古壺狀者百數實石其中空以巨木計曰猺出降無庸發此不然當以此破大藤峽猺具白其酋越數日詣景降旋以母老乞休

林

萬福字季崇進賢人成化進士時冢宰王恕欲釐正鹽法授福兩淮運副分司故有歲例餘鹽盡革之又白督鹾御史豁免各場存積竈丁銀以甦賑累遷南京刑部員外郎出知金華府會逆瑾遣其黨四出校尉樊信恨福無所餽誣以廢事脅吏部勒令致仕居林下二十年卒子鑑知府鑑吏部尙書孫潮右副都御史浩南京禮部侍郎

林志

艾璞字德潤南昌人成化進士授兵部主事累官至副都御史巡撫蘇松先是魏國公徐俌與無錫民訟田璞奉命勘實斷田予民俌銜之遂陰賂劉瑾下其奏復遣勘使者承望風指劾璞前讞非是逮下錦衣衛獄抗辯不屈獄具杖五十盡室編海南爲民瑾誅復官致仕言

路交薦未及徵而卒璞嘗奉詔求言陳修德六事聖政
四事及爲光祿卿時請減齋醮供事冗費侃侃有直臣
風用未盡究士論惜之

人物志

涂昇字卿儀豐城人觀子成化進士授鹽亭知縣復知
蒲臺寬平愷弟民安其政擢監察御史宏治閒彗見天
津陳時政六事清甯宮災疏諭天戒上皆嘉納又劾權
閹李廣及其黨當軸者有所祈免昇弗聽未幾升廣東
副使有通番巨商號八仙爲中官羽翼盡禽治謫戍邊
姦民李招鐵詐稱進貢廉得置於法饒平刷盜蘇孟凱
據鳳凰山熾甚以計散其脅從搘穴平之奉命采珠劉
瑾私詣不遂銜之後致政家居瑾中以御史時事罰米

千石輸雲中

張文
信集

周季麟字公瑞，南寧州人。成化進士，授兵部主事，遷郎中。尚書余子俊、馬文升皆器之。李孜省以左道進有寵，恆推轂其鄉。人季麟固不往。宏治間，升浙江左參政，歷河南、左布政使。周王列其世子罪狀，季麟爲寬旨調護。世子感泣引咎，王亦解慈孝如初。擢右副都御史，巡撫甘肅。奏停歲織紵褐以濟兵荒，用閻臣薦，改鎮薊州。會勘御馬監牧場考證圖籍，還侵地以予民。中貴人不敢撓，旋引疾歸。後逆瑾擅權，以事落職，罰米千石輸邊。瑾誅復官，卒贈右都御史，謚僖敏。

人物志

熊達字成章，南昌人。成化進士，授溧陽知縣。興學校，毀淫祠，責糜粥以活饑民，立義冢以絕水葬。擢監察御史，宏治閒劾太常卿崔志端起家道流姦邪，襄瀆召致火。

災歷真定知府福建左參政以詿誤謫知夔州府致政
歸卒年九十三

人物志

熊繡字汝明豐城人占籍湖廣道州成化進士授行人
擢御史巡按陝西坐劾布政于璠一作藩貪狀謫清豐知
縣起知鳳翔府歲旱禱於岐山須臾大雨遷山東參政
歷右副都御史巡撫延綏改兵部左侍郎未幾以右都
御史巡撫兩廣征賀縣獵賊斬二千八百餘人俘獲四
百有奇召掌南京都察院始繡在兵部結怨中閹後劉
瑾用事密使人至兩廣蹤迹其過見繡自廩米常給外
秋毫無取矯旨勒致仕憾猶未釋又以大同浥爛布豆
爲繡巡撫時罪諷科道論劾提問罰米五百石輸宣大
倉瑾誅召爲南京刑部尙書未幾卒謚莊簡

人物志

丁隆字時雍南昌人成化進士授太平知縣持操矯然人有丁若水之謠嘗築隄捍海至今名爲丁公壩擢監察御史宏治閒巡按湖廣發姦持憲無所徇得罪權貴謫判光州稍徙延平府同知沙寇猖獗隆督兵分捕事平錄功遷廣西僉事厯升兵備副使以老乞休

林志

龔浩南昌人鍵子成化鄉舉其妻徐與李孜省妻兄弟也孜省方貴幸浩上春官猶不往至目爲林靈素孜省中傷之授祿勸州知州尋改潞南值劙竹子龜山二寨兵興浩獨建議主撫遂單車入寨宣示恩威二酋歸順不戮一人而還

人物志

熊一定字廣恆豐城人成化鄉舉授光化知縣知澧州舊有洲地樵牧資焉華陽王府專其利一定力請以予

李漢字允昭豐城人成化進士官工科給事中嘗奉使
甯藩贍金一無所受周藩與大臣交惡奉詔往訊奏云
待宗室當以恩處大臣當以禮事得兩釋初登進士吏
部尙書裕其從伯父也方掌銓衡特遠其居不以家聲
自耀與羅玘相友善卓有才品

林志

黃芸豐城人成化進士任順慶府同知鋤強扶弱威惠
並行擢刑部郎中歸宸濠叛脅之從不屈遂遇害

四川通志

陳伯宣字宏化靖安諸生方居父喪母熊氏尋沒廬墓
者五年忽感蕈草叢生子恩舉宏治甲子鄉試母舒氏
患風遇異人言樹藤蕡酒可療如言母疾愈踰年復苦
痰咳乃啞誕驗其味酸苦母果不起會父左股患毒將
危禱以身代後瘥事繼母不異所生詔旌父子孝行之

周季鳳字公儀甯州人季麟之弟宏治進士授刑部主事遷郎中升四川按察副使備兵建昌抑鎮守太監張辰之橫解士官木泰刺馬琦之讎以治辦聞改雲南督學歷湖廣左布政使平嘉魚寇賀章等擢右副都御史巡撫保定進南京刑部右侍郎以人言解職起右都御史總理漕儲巡撫應天未上卒贈刑部尙書謚康惠著來軒漫稿修江備考修江先賢錄蘇章

李克輝豐城人宏治中爲德陽簿慷慨多大節清白自願先是龍州彝酋叛拒歷年前後招諭皆莫得其要領克輝持檄往爲陳朝廷撫御恩且歷舉自昔梗化之禍又卻其貪金彝酋畏服遂感泣與輝偕詣臺院數其罪

而宥之反側遂定

通志四川

宋景字以賢奉新人宏治進士知睢州改御史抗逆瑾
遂引疾歸以薦起浙江僉事升山西副使會介休縣饑
盜起景獲其渠魁禁捕盜者無妄斷首級民賴以安擢
本省布政累官南兵部尙書召爲都御史未幾卒贈太
子少保謚莊靖

孫章書

萬鏗字仕鳴進賢人宏治進士授刑部主事改吏部歷
文選郎中累遷南京都察院右副都御史進兵部右侍
郎尋陝南院右都御史時肅皇因詩字之變求直言鏗
厯陳時政八事切責遣歸田十餘載值湖廣苗梗化詔
推素有才識堪大事者朝議歸鏗遂起家拜右副都御
史往勘夷情鏗單車就道相機勦撫不逾月奏捷所禽

斬以萬計兼陳久安保治大計十事是後更無苗患尋升兵部左侍郎擢南刑部尚書轉禮部尚書召入爲吏部尚書加太子少保以忤權勢奪職歸隆慶初追復官著有治齋文集

志人 物

范兆祥字延和豐城人七歲作登龜山詩稱神童宏治進士選授檢討侍涇王講讀災異陳言大略謂君后分主陰陽且引紀伯姬叔姬事以諷又謂團營官軍無益宜罷歸三大營通州倉糧宜并運入京倉上謂事涉宮闈非所宜言下錦衣衛獄贖杖還職出爲涇府長史忤王國中人復逮詔獄謫戍永州尋放歸兆祥自負才節故屢遭困踣而其氣不衰

人物志

熊卓字士選豐城人宏治進士授平湖知縣正德初召

爲監察御史值雷震養鷹房疏陳時事明年巡按廣東
投牒籲冤者人人至前言狀豪強股栗吏有干籃盜者
望風先遁未及旬日劉瑾誣以姦黨勒致仕貁在臺爲
都御史張敷華所器重不附瑾故爲所陷未幾卒詩名
與北地信陽相伯仲有熊士選集人物志

葉釗字時勉豐城人宏治進士除南京刑部主事守備
中官侵蘆洲判歸之民應天諸府災土荒政四事尋進
員外郎武宗立應詔陳言宣大被寇殺卒幾千人監督
中官苗達妄報首功乞召還候勘宦官典兵於古未見
唐始用之而宗社邱墟我正統朝用之而鑾輿北狩自
今軍務勿遣監督鎮守者亦宜撤還且國初宦官悉隸
禮部秩不過四品職不過歸除今請仍隸之部易置司

禮俾供襍役罷革東廠移爲他署斯左右不得擅權而後天下可安也又乞召還劉大夏宥諫官戴銑等劉瑾怒坐斷獄詫誤逮下詔獄削籍歸瑾誅起禮部員外郎未聞命卒學者祀之石鼓書院明史

朱廷聲字克諧進賢人宏治進士授行人選御史正德初疏請誅便佞杜逸游以安宗社其略曰邇者聞近侍太監馬永成谷大用劉瑾等各逞姦計作焉淫巧以惑聖聽或導引遊畋或搬弄雜劇馳馬試箭殆無虛日忘情作樂每至夜分而又時出輒城東門外微行物議譁然今人怨天怒災異四起未必不由是數人以致之也望陛下念先帝付託之重自今伊始留意於難保之天命割恩於壞法之小人急敕法司將馬永成等明正

典刑以昭陛下平明之治疏上忤諸閹意劉瑾用事逐廷臣忤己者指廷聲爲奸黨勒罷之瑾誅起南京刑部主事厯升浙江僉事湖廣按察副使福建左布政使右副都御史巡撫湖廣會荆襄饑疫奏發帑金賑之擢刑部右侍郎致仕歸平生清白自矢及退處澹若無官里中尤服其品

明史趙佑傳
人物志

魏榮字喬儀新建人默之子宏治進士授行人司副上書言事無所避忌厯福建參政時古田流賊盤據議者欲屠之榮曰倡亂者馬周良也誅止渠魁耳賊竟解散去民得免株連共肖像祀之

人物志

張元春字幼仁新建人宏治進士授山陰知縣遷知滁州淮上大饑賑恤道殣多所全濟轉蘇州府同知流賊

將犯境元春守太倉常熟誓以身殉民賴之升知梧州
府值軍門初建承檄整理以功進秩三品後歸里以孫
位貴贈太子太保吏部尙書兼文淵閣大學士

人 物
志

張元相字居仁新建人有詩名登經明行修科官甯藩
教授署長史事知濠有逆謀每諫不聽逆將發啖以高
官不從兄元春初官山陰知縣元相隨任受學於王守
仁時撫虔乃密走虔言其狀元相歸方觴母高夫人濠
遭校尉火信縛元相并其弟舉人元龍禁之煅鍊備至
高夫人戒以必不可持二心先自縊及濠成禽守仁兵
至省乃出兄弟於獄元相刑殘不用元龍官至山東鹽

運使

人 物
志

胡訓字誨之南昌人宏治進士由行人擢御史厯浙江

按察僉事改廣東兵備緝捕海盜有功厯湖廣浙江布政使以右副都御史巡撫雲南嘉靖初掌南京都察院每事持大體官至太子少保南京兵部尙書致仕

林志

涂敬字寅之豐城人宏治進士授行人選御史嘉靖閒巡按廣東劾故相子都指揮使梁次據冒官怙勢齧毒鄉民乞正其罪以謝嶺南眾庶之憤仁壽宮災疏言比年以來元老大臣相繼而去羣臣抗疏謫戍編發呂柟馬卿等之降過在可原王相王思之死情尤可憫張璁等倅取於捷徑郭柟等遠逮於道途錦衣衛之冒濫弗覈御用監之匠役增收陳林等之權本陸宣等之勾俸先朝弊政漸次踵行此皆臣等學不足以格君心以致政多闕失上干天和乞賜罷黜疏人報聞升廣東按察

副使罷歸累薦不起

人物志

趙秉貞字正夫新建人宏治甲子科鄉舉知湧安縣設
銅鉦縣門欲憩者擊之寃無不直旋改衡陽縣捐俸賑
饑作歌勸農又於驛路夾植榕松以便行者性至孝母
病刲肉作羹以進家範甚整子弟肅然著有公餘錄林
志
羅明南昌人由吏員任劍州判官正德六年鄱藍等寇
數萬攻城明誓以死守城竟不支被執罵賊以死子諸
生介奮身救父亦死之詔卹廕復爲立忠義廟四川
通志
舒芬字國裳進賢人正德十二年進士第一授修撰時
武宗數微行政遊無度其明年孝貞皇后崩甫踰月欲
幸宣府託言往視山陵罷治道兵衛芬累章切諫不報
乞歸養不許又明年三月帝議南巡時南王宸濠久蓄

異謀與近倖相結人情惶懼言官伏闕諫忤旨被責讓
芬憂之與夏良勝萬潮汪應軫連章入諫又偕編修崔
桐庶吉士江暉王廷臣馬汝驥曹嘉等合疏謂陛下之
出不過如秦皇漢武侈心爲樂而已非能行巡狩之禮
者也博浪柏人其禍亦可鑒矣尙有事堪痛哭不忍言
者宗藩苦劉濞之釁大臣懷馮道之心以祿位爲故物
以朝署爲市塵以陛下爲弈棋以革除年閒爲故事特
左右寵倖知術短淺無能以此言告陛下耳使陛下得
聞此言雖禁門之外亦將警蹕而出尙敢輕騎慢遊哉
疏入帝大怒命跪闕下五日期滿復杖之三十幾薨謫
福建市舶副提舉世宗卽位復故官帝欲尊崇本生芬
偕其僚連章極諫及張璁桂萼方獻夫驟擢學士芬及

同官楊維聰編修王思差與同列拜疏乞罷未幾復借
同官楊慎等伏左順門哭爭帝怒下廷杖奪俸如初旋
遭母喪歸卒於家年四十四世稱忠孝狀元芬倡明絕
學貫串諸經學者稱梓溪先生萬曆中追謚文節先是
修撰羅倫以諫謫福建提舉踰六十年而芬繼之與倫
同鄉同官所謫地與官又同福建士大夫遂祀芬配倫

云明史

萬潮字汝信進賢人正德進士山甯國府推官入爲儀
制主事與舒芬夏良勝陳九川稱江西四諫世宗立起
故官歷浙江提學副使久之遷參政以忤權貴調廣西
屢遷陝西布政使擢右副都御史巡撫延綏所至著

賢績白志

余祺新建舉人正德閒知中江除巨盜釋冤獄全僨民甚眾邑舊有茂州守倉役民破產莫能供力請罷之創五門月城尊經閣重建鄉賢名宦祠社學倉庫樓義阡橋鋪無不加意逃民復業者多升瀘州知州四川通志

周期雍字汝和甯州人正德進士授南京御史劉瑾誅爲瑾斥者悉起給事中李光翰趙士賢等御史貞佐朱廷聲等部郎李夢陽等以兼劾羣闈未得錄期雍偕同官王佩力請皆召用兵部尙書王敵附瑾進期雍請斥之焦芳劉宇猶在列而劉大夏韓文楊守隨林瀚張敷華未雪期雍皆極論之尋清軍廣東出爲福建僉事宸濠反簡銳卒赴討會賊平乃遇嘉靖中累遷都御史巡撫順天薊州密雲關堡數十以避寇警盡移入內地

關外益無備期雍悉修復之入爲大理卿厯刑部左右

侍郎拜尙書十九年因風霾罷免大臣期雍遂去位家

居十年卒

明史鳳先後立朝皆著風績時稱修水三周白志舊案期雍與族祖季麟李

喻茂堅字汝礪豐城人四川榮昌縣籍正德進士知銅

陵臨海二縣以卓異擢監察御史諫南巡及疏都御史

王守仁禽逆濠功嘉靖初巡按陝西發總兵李隆嗾戍

卒殺巡撫許銘狀又請復設總督拂貴臣意出爲真定

知府厯右副都御史撫治鄖陽改巡撫應天累拜刑部

尙書

豫章書

熊彥字說之南昌人正德進士授給事中出核松潘邊

餉劾副總兵張傑褫職世宗踐祚馳疏言大禮出爲河

南參議外艱歸服闋召修明倫大典擢僉都御史遷右

副都御史大典成轉左進右都御史坐持張福獄罷歸
家居十年起南京禮部尙書召爲兵部尙書改吏部所
引拔皆天下知名士會方士胡大順以乩仙進欲祠奉
內庭浹上疏力斥乩仙之妄忤旨切責閱月竟下錦衣
獄遣官校械繫還編氓浹有志節雖由議禮顯然不甚
薰比尤愛護人才隆慶初贈少保謚恭肅明史
豫章書

查仲道字文夫甯州人正德進士授兵部武庫司主事
會當南巡伏闕號諫杖於廷嘉靖初遷郎中升杭州知
府時織造太監吳勳橫甚仲道每事輒阻抑之竟爲所
誣逮至京謫福建運同轉知汀州府卒於官民爲之立

祠豫章書

鄧顯麒字文瑞奉新人正德進士任行人司副諫南巡

廷杖謫國子監學正京闈分考拔楊維聰後爲廷試第一士論服其知人擢御史上疏請講明聖賢有用之學以圖嘉靖中興之治又疏言戚畹陳萬言治第撥官軍八千員名及差官往蔚州買木俱宜停免有夢虹奏議

二卷

豫章書

熊南字天秀南昌人正德進士授行人擢監察御史逆濠將叛密與同年御史蕭淮言之遂發其謀濠果反嘉靖中巡按廣東所至旌廉黜貪人莫敢犯有王指揮者或誣以失律當斬繫獄十餘年訊知其冤并其黨數十人皆得未減用事者反疑其矯激遷太平知府到官五日罷歸廣人莫不惜之弟葛舉人剛正不屈於濠羈禁歲餘窘脅備至幾死終不肯附仕至知縣

豫章書

舒柏字國用靖安人正德鄉舉從王守仁學授欽縣訓導以四禮五倫爲教厯升梧州府同知從守仁平田州有贊畫功遷南京刑部員外出知南甯府有亞學繫言等書豫章

姜儀字君肅南昌人正德進士厯鳳陽永州廣平推官升刑部主事出爲福建按察僉事遷浙江右參議湖廣郴桂兵備副使參政貴州擢福建布政使自公俸外纖毫不以入籍閱一期所積羨餘幾萬兩值建甯大歉發庫藏金及所積羨餘援之活數萬眾進右副都御史巡撫湖廣奉命征苗破重寨三十餘所先是詔儀會同貴州巡撫王學益并力協征學益畏忌不進儀疏劾之王被逮赴京分宜嚴世蕃其姻親也嗾言官劾儀師久費

江西通志卷之三十一 南昌府
財責令罷兵遂謫廣東左參議以疾乞休家居十八年卒所著有周易口義

白志

李金字宣之豐城人正德進士授碭山知縣時流寇猖獗金率民築城以禦之工未竟寇奄至坐謫吳江丞厯兵部郎中與同官疏諫南巡杖於廷嘉靖初升台州知府歲饑易穀鄰郡以爲賑所活不可勝計引年致仕生平力行清儉蔬布之風至老不渝祀碭山名宦

人物志

朱槩字尙節豐城人正德進士知吳縣調旌德升刑部主事厯員外郎疏諫南巡廷杖奪俸遷四川按察僉事平番寇阿戎之叛厯河南參政時鎮守軍夜被殺遺斧或疑屠者王弼旣誣服槩取其斧拭之無脂膏膩辨非屠者立出之人皆傾服

人物志

萬木鄭山俱新建人宸濠遣閻校四出籍民田廬收縛豪強不附者木與山集鄉人結砦自固賊黨謝重一馳馬入都執之積葦張睢陽廟前縛人馬生焚之濠黨不敢犯二人飲江上爲盜凌十一所逼趣見宸濠烙而椎之皆罵賊死明史宋以方傳

趙楠南昌人諸生兄模嘗捐粟佐賑宸濠捕模索金楠代兄往脅之不屈被掠死明史宋以方傳

辜增南昌人宸濠反見迫抗節不從一家百口皆死同時諸生劉世倫儒士陳經白志誤維官義士李廣源皆被掠不屈死明史宋以方傳

聶元濟豐城人正德中以通經舉知彭水興學校勸農桑以德化人民懷遺愛建祠祀之四川通志

樊準字曰式進賢人南昌籍正德鄉舉知徐州廉介彊立政務節財先是中使督廣運倉儲其左右恣甚準至以法繩束之無敢犯會貢鮮中使橫索郵傳供億不貲準輒加裁抑被誣逮繫老幼號泣送者萬人抵京事白得調厯官山西按察僉事人物

高宇字宏望豐城人少孤貧刻意古道正德鄉舉任常德府推官禽劇盜杜卿獲贓萬計毫不自入遷南京刑部主事厯升程番知府捐俸繕學置學田社田數百畝挺身解宣慰司之變以治最聞竟解綬去讀書講學白首無倦程番府後改爲貴陽豫章書

葉景恩新建人以俠聞族居吳城宸濠將作難捕景恩脅降之不從死獄中及宸濠兵過吳城景恩弟景允自志

充以三

誤二

白志作百人邀擊賊賊分兵焚劫景九家其族景

集景修等四十九人皆死

明史宋以方傳

朱拱柂明宗室瑞昌王府輔國中尉宸渠長子封奉國將軍性至孝年十四母范氏危疾翦左手股肉煎湯飲母得愈父疾篤藥勿效又翦臂肉煎湯飲亦愈正德己卯宸濠變逮遷宸渠中都拱柂請代父遷越三年復還冠帶孝養益至嘉靖十年賜詔褒獎以爲宗藩之勸後居父母喪啟酒致奠酒齋內產異芝堅質如木搘紳士夫有孝感異芝詩傳於世諸子至從多知名者多熿多燉以孝友著多熿多燉以秉禮稱多熿多燉以詞賦名多熿杜門卻埽多購異書校讎以爲樂

明史翁王傳林志

朱世忠字良弼南昌人正德舉人知浙江龍泉清慎明

敏平易近民每夜訪民間有朝不謀夕及男讀女工者
次日量以俸米給其家厯政始終如一擢敘州同知

江浙

通志

余禎字興邦奉新人正德進士授工部主事改武庫司
嘉靖甲申議大禮禎與羣臣伏哭左順門下詔獄仆於
闕廷時死杖下者十七人禎其一也穆宗嗣位贈光祿

少卿

明史張潔自傳

楊薰字太和南昌人正德進士授主事謫潮州通判耿
介特立受俸薪猶恐自累遷知州去囊無銖責歷惠州
府同知嘉靖中升四川兵備僉事改貴州致仕家居曳
履徒行絕無貴倨之色巡撫王守仁題清流臣子贈之

人物

魏季蕃字清野南昌人奉母舒氏盡孝母性嗜橘於庭前種橘二本歲取實以供母十年後母沒樹亦枯隨有鳥來巢悲鳴三載終喪鳥去枯樹復甦人以爲孝感所致同時陳白沙舒梓溪皆有詩文美之嘉靖十七年旌

表志白

甘大樞字寬夫奉新人天性孝友器度從容有膽略華林賊掠其母余氏樞冒刃往以計退賊誘禽賊首解官通判汪穎獎以孝義之額士大夫作爲詩文詠其事

縣志

甘文翰字國華奉新舉人天性最孝居喪盡禮公門咫尺絕足不履授湖廣嘉魚知縣平易近民清介自守訟

簡民安卒於官崇祀名宦鄉賢

崇祀錄

江西通志卷一百三十六